

## Adil Šaković, dipl.inž.geod.



Dana 25.12.2011. godine nas je napustio još jedan kolega iz stare garde geodetskih stručnjaka na ovim prostorima.

Adil Šaković je rođen 7. aprila 1939. godine u Gacku, gdje je završio osnovnu školu. Srednju geodetsku školu je završio u Sarajevu 1959. godine, kao stipendista novoformiranog Geodetskog zavoda BIH, gdje se uskoro i zaposlio. Nakon toga upisuje Višu geodetsku školu u Sarajevu, a potom i Geodetski fakultet Sveučilišta u Zagrebu kojeg s uspjehom završava i stiče zvanje diplomiranog inženjera geodezije.

U Geodetskom zavodu BiH je radio u odjeljenju fotogrametrije, a kao mladi stručnjak dao je veliki doprinos uspostavi novog premjera i katastra zemljišta. Često je znao reći da je „pješke obišao pola Bosne, a i rodne Hercegovine“, radeći u teškim uslovima na pripremama za aerofotogrametrijsko snimanje BiH i kasnije na izradi planova novog premjera.

Augusta 1974. godine dolazi raditi u tadašnju SO Vogošća na mjesto direktora Sekretarijata za geodetske poslove i katastar zemljišta, gdje ostaje do početka agresije na Bosnu i Hercegovinu 1992. godine. Početkom rata je bio u redovima branilaca BiH, a onda biva raspoređen na radnu obavezu i sa saradnicima osniva geodetsku službu u ratnoj opštini Vogošća.

Godine 2000. osniva privatni geodetski biro „GEODOM“ gdje ostaje do odlaska u penziju 2009. godine.

Adil je također dugi niz godina obavljao poslove sudskog vještaka i nadvještaka, gdje je svojom stručnošću, ali i autoritetom rješavao naizgled nerješive sporove.

Svoje dugogodišnje iskustvo je nesebično prenosio na mlađe generacije, na čemu sam mu i ja zahvalan, jer me naučio stvarima koje se ne uče u školskim klupama.

Svima onima koji su ga poznavali je bila čast što su imali priliku živjeti, raditi i družiti se s našim Akom.

*Admir Merdžanović*